



ERasmus Osualdus natus est in comitatu Merckenstein Austriae ditionis, anno 1511. Is cum prima literarum fundamenta foeliciter in patria iecisset, sese ad varias Germaniae Academias contulit, atque in primis Ingolstadij, Lypsiae, & Basileae diligentem operam literis nauauit. In ijs locis cum praecalam sibi eruditionem comparasset, sese Memmingam amoenam Sueuiae ciuitatem contulit, atque in eo loco scholae praefectus fuit. Postea uero Tubingam peruenit, atque Magisterij gradu ornatus stipendio principis Hebraeas literas magna laude exposuit. Cum hoc modo uarijs functionibus sese exerceret, atque in primis Sebastiani Monasteri praepitoris sui exemplo Hebraeae linguae atque disciplinis Mathematicis operam nauaret, anno 1551 Friburgum Brisgauriae uocatus est, ut & Mathematica doceret, atque Hebraeae linguae mysteria explicaret. Id quod ipse singulari dexteritate perfecit, atque non modo sibi, sed etiam toti academiae magnam existimationem comparauit. Scripsit quoque in Sphaeram doctissima commentaria, atque Ptolomaeum egregie restituit. Inter alias quoque lucubrations Testamētum nouum in Hebraicam linguam primus uertit, atque scriptum exemplar pro sua humanitate, cum 1565 Friburgi essem, in proprio Musaeo ostendit, quod etiam breui ipsum magna Theologorum expectatione in lucem aediturum speramus. Huic eruditioni accedit etiam uitae integritas, & docendi fidelitas, ut merito hoc loco huius uiri ob uarias dotes inter Germaniae proceres mentio facta fuerit, Anon.